

Marihuana por causa daño severo riba nos salud

ORANJESTAD – Aunke cu hopi programanan di conscientisacion a wordo propaga riba consumo di marihuana y ki efectonan cu e por tin riba salud, sinembargo por haya den varios noticia di polis cu **BON DIA ARUBA** sa publica cu e consumo di droga, c/q marihuana ta keda halto. Asina mes cu polis ta combati esaki cu man duro, dor di detene personanan cu ta huma marihuana, dia pa dia ta haya hende cu ta prefera tuma e riesgo y huma esaki den publico.

CONSECUENCIANAN

Ta bon pa un biaha mas trece dilanti kico por ta e consecuencias cu marihuana ta trece pa nos salud. Fundacion Anti Droga Aruba den varios ocasion a bin cu programanan educativo, manera por ehempel Paga Tino, pa pueblo, en particular nos hobennan riba uzo di droga, entre nan marihuana, pero, ta manera manda ta manda hende consumi esaki, sin tene cuenta riba e consecuencias cu esaki por trece.

Mundialmente ta propaga e dañonan cu no solamente droga, pero marihuana tambe, por causa na nos salud. Aunke cu e debate riba su legalisacion ta topico di dia den varios pais, científico y mediconan ta adverti riba e prehuicionan grave riba salud cu su consumo ta produci.

TEMA DI CONTROVERSIDAD

E legalisacion di droga ta un tema cu ta genera controversia desde varios aña na mun-

do. Uruguay ya a converti den e prome pais di America Latino cu a legalisa e consumo di marihuana, mientras cu den e resto di e estadonan den e region ta continua cu e debate cu bosnan na favor y den contra.

Un informacion efectua pa Organizacion di Nacionnan Uni (ONU) a revela cu aproximadamente 4% di e poblacion mundial, mas of menos 162 miyon di persona, ta uza marihuana cada aña y mas of menos 22.5 miyon ta uza marihuana diariamente.

TENDENCIA

Aunke cu den nos pais e ta prohibi, pero su consumo ta purba di impone como un moda “natural”, ta existi abundante evidencia científico cu ta proba e daño cu marihuana ta causa.

HOPI MAS POTENTE

Tin hopi preocupacion den e ambiente psiquiatrico pa e cantidad grandi di e uzo di e droga aki.

Den actualidad, e takinan di cannabis tin un concentracion haltisimo di alcaloide, mucho mas superior compara cu decananan atras. Su efecto ta hopi mas potente.

BIPOLARIDAD OF SCHIZOFRENIA

E personanan cu ta consumi marihuana y tin predisposicion na padece trastornonan di bipolaridad of schizofrenia, e procesonan aki ta wordo acelera: e cuadro lo rebisti mayor gravedad y e contesta terapeutico lo ta menor.



Mescos ta sosode den personanan cu trastorno di panico. Marihuana tambe ta provoca trastornonan cognitivo, ya cu e tin consecuencia riba funcionnan ehecutivo di e cerebro y ta genera efectonan neurotoxico irreversibel.

E droga aki tambe por provoca e aparicion di e syndroom amotivacional pa cannabis, un trastorno riba e conducta cu ta aparece pa e consumo cronico y cu ta genera un dificultad pa implementa actividadnan riba largo plaso.

CAMPAÑA DI EDUCACION

Pa evita esaki, ta bon pa haci un campaña di educacion masivo pa hende sa loke nan ta expone nan mes. Esunnan cu mas ta den peliger ta e adolescentenan: den nan, e daño ta mayor ya cu marihuana ta afecta e lobulo frontal, cu durante e etapa di bida aki ta cabando di madura.

Den un estudio cu a wordo efectua pa British Lung Foundation (Fundacion Britanico di Pulmon) ta sigura cu esun cu ta huma marihuana, tin binti biaha mas riesgo di desaroya cancer na pulmon, compara cu esun cu ta huma tabaco.

Ta alarmante cu, aunke investigacionnan nobo ta continua na revela e multiple consecuencias cu huma marihuana tin riba salud, ainda ta existi un falta peligroso di conocimiento publico riba e prehuicionan cu e droga aki por ta.

Tur droga tin su efectonan nocivo y cu ta existi e creencia falso cu marihuana ta esun menos dañino. Hende

ta bisa cu ta algo natural, pero tur venenonan activo ta producto di substancianan natural, di mata: cu e ta natural no ta nifica cu e no ta mortal. Ta un idea estúpido, un persona por intoxicar su mes y muri tambe cu cosnan natural.

EFECTONAN CU TA PERDURA

Marihuana ta liposoluble, e ta mara su mes na e muraya di e neurona y ta tarda den desacopla: aunke cu e persona ta sinti cu e efecto a pasa, e droga ta sigui ta den e curpa y teniendo su accion dañino. E por provoca situacionnan di intoxicacion agudo, algun cuadro di despersonalisacion y hasta psicosis.

Hopi ta asocia e droga aki cu tranquilidad, pero, por lo contrario, personanan por bira hopi agresivo. Cada biaha nan tin mester di consumi mas pa aumenta e efecto y cu e uzo cronico, ta cuminsa stop pa cumpli cu trabao y individualonan por bira mas irresponsabel.

Su consumo no ta ocasiona morto di manera directo, pero por provok'e di modo indirecto, manera ta e caso cu por desata un brote psicotico y e persona por perde nocion di loke e ta haci.

EFECTONAN RIBA CEREBRO

E efectonan di marihuana ta basta severo riba e cerebro. Ora cu ta huma marihuana, su ingrediente activo, THC (Tetrahydrocannabinol), ta biaha den e curpa, incluyendo e cerebro, pa produci su efectonan diverso.

THC ta adheri na luganan yama receptor di cannabinoidenan ubica den e celulan nervioso di e cerebro, afectando e manera cu esakinan ta funciona.

Tin abundancia di receptornan di cannabinoides den e partinan di e cerebro cu ta regula e movimiento, e coordinacion, e siñamento, memoria y funcionnan cognitivo superior, manera huicio y placer.

EFECTONAN DI MARIHUANA DEN ORGANISMO

Ora cu huma marihuana, THC ta pasa rapidamente di e pulmonnan pa sanger, cu ta transport'e pa e cerebro y pa otro organonan di e curpa. Ora cu esaki yega den e cerebro, e ta cambia e manera con pa yega y ta procesa e informacion sensorial den e hipocampo.

E persona cu huma marihuana, frecuentemente e tin e mesun problemaman respiratorio di humadonan normal. Despues di hum'e, e frecuencia cardiaca ta aumenta entre 20 y 100 por ciento. E efecto aki por dura te cu 3 ora.

BO DECISION

Cu e informacion aki, abo, como consumidor of cu tin pensa pa consumi marihuana, por pensa dos biaha riba e consecuencias cu esaki por trece pa bo salud.

Mescos cu sigaria of cualkier otro droga adicional, marihuana por causa adiccion y esaki por tin efectonan no solamente riba bo salud, pero tambe den bo cartera. □